

## Қазақстан Республикасының мемлекеттік нотариустарын аттестациядан өткізу туралы ЕРЕЖЕ

### *Күшін жойған*

Қазақстан Республикасының Әділет министрі 1997 жылғы 30 шілдедегі N 344 Қазақстан Республикасы Әділет министрлігінде 1997 жылғы 5 тамызда тіркелді. Тіркеу N 344. Күші жойылды - ҚР Әділет министрлігінің 1997.11.24. N 109 бұйрығымен.

#### I. Жалпы ережелер

1. Қазақстан Республикасының "Нотариат туралы" Заңының 105-бабына сәйкес мемлекеттік нотариустар аттестациядан өтуге тиіс.

Мемлекеттік нотариустарды аттестациядан өткізу олардың біліктілік деңгейін бағалау және осының негізінде олардың лауазымына сәйкестілігін айқындау мақсатында жүргізіледі.

2. Нотариалдық қызмет стажына қарамастан, аттестация өткізу сәтінде жоғары заң білімі бар, жұмыс жасап жүрген мемлекеттік нотариустар аттестациядан өтуге тиіс.

Аттестация өткізу сәтінде жоғары заң білімі жоқ мемлекеттік нотариустар аттестациядан өтуге жіберілмейді. Жұмыс сапасының нашарлығы, кәсіптік білімі мен құқықтық мәдениеті деңгейінің төмендегі себебінен облыстық әділет басқармасының бастығы аттестацияға ұсынуда бас тартқан нотариустар да аттестациядан өткізу комиссиясының шешімі бойынша аттестациядан өтуге жіберілмеуі мүмкін.

3. Жүктілігі, босануы және баланы күтуіне байланысты демалыста жүрген немесе бала үш жасқа толғанша оны күту жөніндегі еңбекақысыз қосымша демалыста жүрген әйелдер, сондай-ақ жыл сайынғы демалыста және еңбекке уақытша жарамсыздығы бойынша демалыста жүрген адамдар жұмысқа шыққан соң аттестациядан өтуге тиіс.

4. Мемлекеттік нотариустарды аттестациядан өткізу үшін Қазақстан Республикасы Әділет министрінің бұйрығымен орталық аттестациядан өткізу комиссиясы және аймақтық аттестациядан өткізу комиссиялары құрылады.

5. Орталық аттестациядан өткізу комиссиясы аймақтық аттестациядан өткізу комиссияларының шешімдеріне берілген шағымдарды қарайды, аттестациядан өткізу басталған күннен бастап бір жыл ішінде дәлелді себептер бойынша

аймақтық аттестациядан өткізу комиссиясына аттестациядан өтуге екі рет келмеген нотариустарды аттестациядан өткізеді, сондай-ақ нотариустарды аттестациядан өткізуге арналған сұрақтар тізімін бекітеді.

Орталық аттестациядан өткізу комиссиясы Қазақстан Республикасының Әділет министрі бекітетін Ереже негізінде қызмет етеді.

6. Аймақтық комиссиялар тиісті облыстардың, республикалық мәні бар қалалардың және астананың мемлекеттік нотариалдық кеңселерінің мемлекеттік нотариустарын осы Ережеге сәйкес аттестациядан өткізеді.

7. Аттестациядан өткізу мерзімін Әділет министрінің ұсынуы бойынша орталық аттестациядан өткізу комиссиясы айқындайды.

8. Нотариустарды аттестациядан өткізуге арналған сұрақтар тізімін Әділет министрлігі қазақ және орыс тілдерінде дайындайды. Сұрақтар тізімі Орталық аттестациядан өткізу комиссия бекіткен соң аттестациядан өткізу басталар алдындағы қырық бес күннен кешіктірмей облыстық әділет басқармаларына таратылады.

9. Аттестациядан өткізуге арналған сұрақтар тізімін облыстық әділет басқармасы аттестациядан өтуге тиіс барлық нотариустарға аттестация басталар алдындағы отыз күннен кешіктірмей қол қойғызып таратады.

10. Аттестациядан өтушілерге арналған жадығаттарды Орталық және аймақтық аттестациядан өткізу комиссияларына облыстық әділет басқармаларының бастықтары береді. Аттестациядан өтушілерге арналған жадығаттар аймақтық аттестациядан өткізу комиссиясына аттестациядан өткізу басталар алдындағы бір күннен кешіктірмей беріледі.

11. Орталық аттестациядан өткізу комиссиясы қызметін ұйымдастыру-техникалық қамтамасыз ету Әділет министрлігіне, ал аймақтық аттестациялық комиссиялардың қызметін қамтамасыз ету-әділет басқармаларына жүктеледі.

## II. Аттестацияны дайындау және өткізу тәртібі

12. Аттестациядан өтуге тиіс нотариусқа арнап мыналар беріледі:

- 1) әділет басқарма бастығының ұсынуы;
- 2) аттестациядан өтушінің кәсіптік, іскерлік және адамгершілік қасиеттері көрсетілген қызметтік мінездемесі;
- 3) білімі жөніндегі дипломының нотариалды куәландырылған көшірмесі;
- 4) аттестациядан өтушінің өз қолымен жазған өмірбаяны;
- 5) әділет басқармасы кадр бөлімінің бастығы куәландырған, көлемі 3x4 болатын фотосуреті бар, аттестациядан өтушінің жеке қағазы.

Берілген жадығаттарға аттестациядан өтушінің нотариалдық әрекеттеріне қатысты соттардың бар қаулыларының көшірмелері, соңғы екі жыл ішіндегі мадақтаулар мен тәртіптік жазалар туралы бұйрықтардың көшірмелері, әділет басқармасы алқасы қаулыларының көшірмелері, аттестациядан өтушінің кәсіптік қызметін 1995-1997 жылдар арасында тексеру нәтижелері жөніндегі анықтамалардың көшірмелері, соңғы екі жыл ішінде аттестациядан өтушінің үстінен берілген шағымдар туралы мағлұматтар және олар бойынша әділет органдары қабылдаған шешімдердің көшірмелері қоса берілуге тиіс.

Аттестациядан өтуге тиіс нотариус берілетін мінездемемен және басқа жадығаттармен аттестациядан өткізу басталар алдындағы жеті күннен кешіктірмей қол қойып танысуы қажет.

13. Аттестациядан өтетін нотариустарға әділет басқармасы аттестациядан өткізу басталғанға дейін үш күн бұрын оның басталуы және өту орны туралы жазбаша түрде хабарлауға тиіс.

14. Аймақтық аттестациядан өткізу комиссиясы осы Ереженің 12-тармағына сәйкес нотариусқа арнап берілген құжаттарды қарайды, қажет болған реттерде нотариустың өзін тыңдайды және нотариустың аттестациялық емтихан тапсыруына рұқсат ету туралы жазбаша түрде шешім қабылдайды. Рұқсат етуден бас тартылған жағдайда шешім дәлелді болуға тиіс.

15. Аттестациядан өткізу аттестациядан өтушінің қалауы бойынша қазақ немесе орыс тілдерінде жүргізіледі.

16. Компьютерлік аттестациялық емтихан тапсыру барысында аттестация өткізуге арналған сұрақтар тізіміне енгізілген 100 сұрақтың 65-на дұрыс жауап берген нотариус аттестациядан өткен болып есептеледі.

Аттестациядан өткізуге арналған сұрақтар тізіміне енгізілген 100 сұрақтың 55 -нен бастап 65-не дейін дұрыс жауап берген нотариусқа аттестациядан өткізу комиссиясының мүшелері қосымша ауызша сұрақтар қоя алады.

Бұл жағдайда аттестациядан өткізу немесе аттестациядан өткізу туралы шешім қосымша сұрақтарға берілген жауаптар нәтижесі ескеріліп қабылданады.

17. Аймақтық аттестация өткізу комиссияларының мәжілістері оның мүшелерінің кемінде төрттен үші қатысқанда заңды болады.

Комиссия мәжілісінде хаттама жүргізіледі. Хаттамада мыналар көрсетілуге тиіс:

мәжілістің өту уақыты мен орны, комиссия құрамы, аттестациядан өтушінің тегі, аты, әкесінің аты және лауазымы, емтихан нәтижелері, аттестациядан өтушіге қойылған қосымша сұрақтар және оларға аттестациядан өтуші берген жауаптар, сондай-ақ комиссия қабылдаған шешім.

Комиссия шешімі оның мүшелерінің жалпы санының үштен екісінен құралатын қарапайым көпшілік дауысымен аттестациядан өтушінің қатысуынсыз

кабылданады. Дауыстар саны тең болған жағдайда, комиссия төрағасының дауысы шешуші болады.

Мәжіліс шешіміне және хаттамасына оның барлық мүшелері қол қояды.

Аттестациядан өтушіні аттестациядан өткізу нәтижелері дәл сол күнде хабарланады. Комиссия шешімі аттестациядан өтушіге оның өтініші бойынша беріле алады.

18. Аймақтық аттестациядан өткізу комиссиясының шешімі хаттамадан бөлек ресімделеді және онда комиссияның аттестациядан өтуші үміткер жөніндегі шешімі және мынадай қорытындысы болады:

- аттестациядан өтті;
- аттестациядан өткен жоқ.

Аттестациядан өткізу басталған күннен бастап алты ай ішінде нотариус дәлелсіз себептермен немесе белгісіз себептермен қайтадан келмеген жағдайда аймақтық аттестация өткізу комиссиясы "Аттестацияға келмеуіне байланысты аттестациядан өткен жоқ" деген шешім қабылдайды.

19. Аймақтық аттестация өткізу комиссиясының нотариустың аттестациядан өтпегендігі туралы шешімін аттестациядан өткен адам комиссия шешімінің көшірмесін алған күннен бастап он күн ішінде Орталық аттестациядан өткізу комиссиясына шағымдай алады.

20. Орталық аттестациядан өткізу комиссиясының шешімдері үзілді-кесілді шешім болып табылады.

21. Қазақстан Республикасының "Нотариат туралы" Заңының 105-бабының 2-тармағына сәйкес аттестациядан өтуге жіберілмеген, сондай-ақ аттестациялық комиссиялар аттестациядан өткізбеген мемлекеттік нотариустар республиканың қолданылып жүрген еңбек туралы заңдарына сәйкес лауазымдарынан босатылады.

22. Аймақтық аттестациядан өткізу комиссияларының және Орталық аттестациядан өткізу комиссияларының нотариустардың аттестациядан өтуі туралы шешімдері олар қабылданған күннен бастап он күн ішінде, аттестациядан өткен мемлекеттік нотариустарды қайта тағайындау туралы не аттестациядан өтпеген нотариустарды қызметтерінен босату туралы бұйрық шығару үшін облыстық әділет басқармаларына жіберіледі.